

Na osnovu člana 25. stav (1) tačka a) Zakona o putnim ispravama Bosne i Hercegovine ("Službeni glasnik BiH", broj 4/97 , 1/99, 9/99, 27/00, 32/00, 19/01, 47/04 , 53/07, 15/08, 33/08 i 39/08), Ministarstvo civilnih poslova Bosne i Hercegovine donosi

UPUTSTVO

O NAČINU ODUZIMANJA I PONIŠTAVANJA PUTNIH ISPRAVA

Član 1. (Predmet)

Ovim Uputstvom propisuje se način i postupak oduzimanja i poništavanja putnih isprava Bosne i Hercegovine (u daljnjem tekstu: putne isprave) i način evidentiranja podataka o oduzetim i poništenim putnim ispravama od strane nadležnih organa za izdavanje putnih isprava u Bosni i Hercegovini i Diplomatsko konzularnim predstavništvima Bosne i Hercegovine u inozemstvu (u daljnjem tekstu: nadležni organi), u skladu sa Zakonom o putnim ispravama Bosne i Hercegovine, kao i način postupanja drugih organa u Bosni i Hercegovini, kada u okviru svojih nadležnosti, u skladu sa krivičnim i prekršajnim zakonodavstvom u Bosni i Hercegovini privremeno oduzmu putnu ispravu.

Član 2. (Zahtjev za oduzimanje i poništavanje putne isprave)

- (1) Nadležni organi Bosne i Hercegovine, nadležni organi u entitetima i Brčko Distriktu Bosne i Hercegovine kada utvrde postojanje zakonskog osnova za oduzimanje putne isprave propisanog Zakonom o putnim ispravama Bosne i Hercegovine dostavljaju zahtjev za oduzimanje putne isprave nadležnom organu koji je istu izdao.
- (2) O zahtjevu iz stava (1) ovog člana odlučuje nadležni organ i navedenu činjenicu konstatuje u centralnu bazu putnih isprava

Član 3. (Sadržaj zahtjeva, provjera podataka i rješenje o oduzimanju putne isprave)

- (1) Zahtjev za oduzimanje putne isprave treba da sadrži identifikacione podatke osobe za koju se zahtjev podnosi i to: JMB, prezime, ime, ime roditelja, datum i mjesto rođenja, prebivalište i adresu, zakonski osnov za oduzimanje i poništenje putne isprave i naziv organa koji je izdao putnu ispravu i broj putne isprave.
- (2) Kada nadležni organ primi zahtjev za oduzimanje putne isprave obavezan je odmah provjeriti u centralnoj evidenciji izdanih putnih isprava Bosne i Hercegovine da li osoba za koju se podnosi zahtjev posjeduje važeću putnu ispravu.
- (3) Ako nadležni organ, koji je izdao putnu ispravu ili na čijem području osoba za koju se traži oduzimanje ili poništavanje putne isprave ima prebivalište, utvrdi da osoba za koju se podnosi zahtjev posjeduje važeću putnu ispravu i da postoje zakonski uvjeti za oduzimanje ili poništavanje putne isprave, donosi rješenje o oduzimanju ili poništavanju putne isprave.

Član 4. (Način oduzimanja putne isprave)

- (1) Nadležni organ poziva nositelja putne isprave da putnu ispravu preda nadležnom organu. Ukoliko nositelj putne isprave ne preda putnu ispravu, putna isprava će se prisilno oduzeti. O oduzetoj putnoj ispravi izdaje se potvrda.

(2) U hitnim slučajevima putnu ispravu može privremeno oduzeti i drugi organ nadležan za izdavanje putne isprave ili organ nadležan za kontrolu prelaska državne granice pri čemu se osobi kojoj je privremeno oduzeta putna isprava izdaje potvrda.

(3) Ukoliko se privremeno oduzeta putna isprava ne vrati osobi od koje je oduzeta nakon 24 sata od oduzimanja, ista se odmah a najkasnije u roku od 3 dana dostavlja nadležnom organu koji je izdao putnu ispravu.

(4) O dostavljanju privremeno oduzete putne isprave iz stava (3) obavještava se osoba čija je putna isprava privremeno oduzeta.

(5) Oduzimanje putne isprave predstavlja zabranu za izdavanje nove putne isprave istoj osobi.

(6) Postupak iz stava (3) i (4) smatra se hitnim.

Član 5.

(Deponovanje i vraćanje oduzete putne isprave)

(1) Privremeno oduzeta putna isprava se deponuje i čuva kod nadležnog organa.

(2) Nakon prestanka razloga za privremeno oduzimanje putne isprave nadležni organ vraća putnu ispravu nositelju putne isprave.

Član 6.

(Poništavanje putne isprave)

(1) Nadležni organ vrši poništavanje putne isprave za koju je utvrđeno da sadrži lažne podatke, kojoj je istekao rok važenja, putne isprave osobe koja je prestala biti državljanin Bosne i Hercegovine, te putne isprave koja je zamijenjena i oštećene putne isprave.

(2) Poništavanje putne isprave vrši se fizičkim uništenjem putne isprave i otiskivanjem štambilja "poništeno" preko upisanih podataka u putnoj ispravi i praznim stranicama putne isprave.

(3) Poništena putna isprava može se vratiti nositelju putne isprave na njegov zahtjev izuzev putne isprave koja sadrži lažne podatke.

Član 7.

(Evidencija)

Nadležni organ za izdavanje putnih isprava vodi evidenciju oduzetih i poništenih putnih isprava u elektronskom obliku.

Član 8.

(Prestanak primjene ranijeg propisa)

Stupanjem na snagu ovog Uputstva prestaje važiti Uputstvo o načinu oduzimanja i poništavanja putnih isprava ("Službeni glasnik BiH", broj 10/98).

Član 9.

(Stupanje na snagu)

Ovo Uputstvo stupa na snagu osmog dana od dana objavljivanja u "Službenom glasniku BiH".

Broj 06-2-30-4-161/09
2. jula 2009. godine

Ministar
Mr. Sredoje Nović, s. r.